

# Die Schwarze 2010

Sit 18 Jahr unterwägs!

Z'Kopenhagen isch's viel z'heiss  
Bi de Klima-Gurus louft der Schweiss,  
Ja die warmi Luft, das weiss me scho,  
Isch vo dene sälber cho!

\*\*\*\*

U der Leue-eh-bärger-eh- der Kluge,  
Fahrt a d' Klimakonferenz im Zuge!  
Sehr viel dümmmer isch's da scho,  
Dass dä wieder zrügg isch cho!

\*\*\*\*

Für 22 Millione,  
erwarte d' Lüt Attraktionen,  
Zwe Bäre allei chöis ja nid si,  
S' muess mindestens no d'Hayoz dri!

\*\*\*\*

O der Blocher hett-für i d'Medie z'cho-  
Chürzlech ä Sprung i Bärepark gnoh!  
„Dä friss ig nid“, ghörsch der Finn lut motze,  
Ja, mir finde dä ja o zum chotze!

\*\*\*\*

Das Bildli da isch ke Scherz,  
S'isch ds Passfoto vom Ruedi Merz,  
Si halt nume no zwe Ohre,  
Der Räscht het är scho lang verlore!

\*\*\*\*

Schlaf, Ueli schlaf,  
Der Blocher hütet d'Schaf,  
We du schlafsch, de bruchsch ke Gäld,  
Für die bescht Armee vor Wält!  
Schlaf, Ueli schlaf!

\*\*\*\*

Wette, bschiisse, abkassiere!  
Goalie, Stürmer, Schiri schmiere!  
Doch s'gröschte Schlitzohr – jedi Wett -  
Isch u blibt der Blatter Sepp!

\*\*\*\*

Mir hei vom Béglé scho äs Värslü gmacht,  
wo di ganzi Schwiz hätt drüber glacht!  
Doch für einisch hets Poscht schnäll erlickt  
Und ne als Muschter ohni Wärt zrüggschickt!

\*\*\*\*

US-Boni-Gopferdori-Stüre-Date-Kompromiss,  
Cheibe Schwobe-hingerzoge-bitzli-gloge-  
mir hei Schiss!  
Schwige, muure, ei Salat,  
Läck hei mir ä Bundesrat!

\*\*\*

Ds BAG isch schampar froh,  
Denn der Pandemiebricht lutet so:  
Ir nächschte Zyt chönnts tatsächlech glinge,  
Irgendeine mit Schweinegrippe z' finge!

\*\*\*\*

Und d'Novartis impft die halbi Wält,  
Das git viel Ruhm u no meh Gäld!  
Denn si hei für die unheilbar Gsunde,  
Ä Impfstoff gäge d'Dummheit gfunde!

\*\*\*\*

D'Widmer-Schlumpf seit: „S'muess itz si,  
Mir lade der Gaddafi i!“  
A nes Festival als Ehregascht  
U gheie ne de grad i Knascht!

\*\*\*\*

Der Roger Federer, das isch nid nöi,  
Sig sire Mirka schins no tröi.  
Nid so wie der Tiger Woods,  
Dä versänkt si Schnidel i jedem...Loch.

\*\*\*\*

Der Stadtbach fliesst paar Meter offe  
U s'isch no kene drin versoffe!  
Itz agnoh der Tschäppät isch chli bsoffe,  
Ja, da wei mir doch alli z'Beschte hoffe!

\*\*\*\*

So nes Minarettli – s'sisch ja klar -  
Isch für üs ä grossi Gfahr!  
Nur der Berlusconi bhauptet immer,  
der Mailänderdom sig viel viel schlimmer!

\*\*\*\*

U d' Julia Onken seit: „Jawohl!  
S'Minarett isch es klasischs Phallussymbol!“  
Druf seit mi Frou zu mir im Bett:  
„Ich wett du hettsch es Minarett!“

\*\*\*\*

Uf e letscht Vårs wartet dir vergäbe,  
Dä singe mir öich nie im Läbe!  
Das isch legal, das isch ke Bschiss,  
Das isch eifach z'Bankgheimnis!